

# H A R A N G V E

A V R O Y.

3837

1617.

*Par Reuerendissime Pere en Dieu Messire GASPARD  
DINET Euesque de Mascon, Conseiller &  
Predicateur ordinaire de sa Majesté.*

En presence de plusieurs Princes, Ducs & Pairs, de  
Messieurs les Chancelier, Garde des Sceaux, au-  
cuns des Secretaires d'Estat, & grand nombre de  
Seigneurs & Officiers de la Couronne.

Ledit Seigneur Euesque assisté de Monseigneur le  
Cardinal de Guise, & des Archeuesques, Eues-  
ques, Abbez, & autres Deputez Ecclesiastiques  
en l'Assemblée du Clergé de France qui se tenoit  
aux Augustins.

Sur les plaintes des Catholiques de Montpellier,  
& pour le reestablissement entier de la Religion  
Catholique, Apostolique & Romaine, en la Sou-  
ueraineté de Bearn, avec la restitution des biens  
aux Ecclesiastiques.

*Faite & prononcée au Louure le Vendredy 2. Iuin 1617.*

Auec l'Arrest du Conseil d'Estat, le Roy y seant, tant sur le Re-  
establissement entier de ladite Religion Catholique en Bearn,  
que sur ladite Restitution des biens aux Ecclesiastiques,  
Donné à Fontainebleau au mois de Iuillet 1617.



A PARIS,

Chez PIERRE BILLAINE, au Palais pres la Chapelle  
sainct Michel.

---

M.D.CXVII.

*Auec Permission.*

## PERMISSION.

**I**L est permis à Iean Richer Libraire  
Juré en l'Vniuersité de Paris, d'imprimer les Remonstrances faictes au Roy par le Clergé de France durant leur Assemblée, tenuë à Paris l'an 1617. Avec deffenses à tous Libraires de les contrefaire, sur peine de confiscation d'exemplaires, & d'amande.

H. DE MESMES. DE PARIS.



# HARANGVE AV ROY.

*Par Reuerendissime Pere en Dieu  
Messire GASPARDINET E-  
uesque de Mascon, Conseiller &  
Predicateur ordinaire de sa Maje-  
sté.*

**S**IRE,

La Religion & la Iustice sont  
deux sœurs iumelles qui s'enrr-  
ayment vniquement, pource que, dit vn  
ancien, elles ont vn mesme sang, ont esté  
formees & tournees en vn mesme ventre,  
sont nees en mesme iour, en mesme heu-  
re, en mesme point; C'est pourquoy elles  
ont mesme horoscope, mesmes aspects;  
heureuses ensemble, mal-heureuses en-  
semble; vn bien commun, vn mal com-  
mun; participantes par societé de nature  
à mesme felicité & infortune; elles ont



mesmes amys & mesmes ennemys.

Il est de la Iustice & de la Religion, ce que de la Lune & de la Mer: Si la Lune est au plein, la Mer est aussi au plein; si elle est en son decours, la Mer y est de mesme. C'est cōme du Soleil & du Soulcly; quand le Soleil commence à paroistre, le Soulcly s'escloft & s'espanoūt; est-il en son midy, le Soulcly faiet aussi paroistre le midy de sa beauté, ouurant son petit sein & esparpillant ses feuilletes comme autant de petits rays: Mais si le Soleil est en son occident, ceste fleur naturellement amoureuse de cest Astre, se cloft, se ferme, & se cache avec luy.

Ainsi la Iustice n'a ny force ny vertu sans la Pieré: ainsi la Religion ne peut subsister sans la Iustice; qui attaque l'une, destruit l'autre; elles ne peuvent viure ny mourir qu'ensemble. Ce sont ces deux fermes colonnes sur lesquelles se portēt tous les Estats: qui en pèse esbranler l'une, estonne, croule & renuerse l'autre.

Il semble, SIRE, qu'en ce nouueau re-stablissement de vostre Estat vous ayez voulu commencer par la Iustice, relevant vos subjects de l'oppression qui sembloit les menacer, afin de meriter le nom de lu-

Re & de Iusticier: Mais permettez que nous vous disions avec l'honorable liberté de nos charges, & avec l'humble submission & le deuotieux respect que nous deuons à Vostre Majesté, que si en mesme temps vous ne faiçtes paroistre la Pieté par vn zele ardent de la conseruatiō de la Religion Catholique Apostolique & Romaine, en laquelle apres vos Ancestres vous auez esté nourry & esleué, cest oeuvre heureusemēt commencē demeure imparfaict; & que si vostre Couronne n'est continuellement soustenuë sur vostre Chef, par ses deux fortes & puissantes mains, elle sera tousiours chācellante.

Nous ne nous plaignōs pas de ce qu'en ce champ de la Frâce, trop fertile en monstres & espines, l'iuroye de l'heresie se voye pelse-meslée avec le froment de la Sainte doctrine, puisque nous sommes aduertis d'attēdre la moisson; mais qu'en quelques endroicts de vostre Royaume on permette que les ronces arrachent & estouffent la bonne & salutaire semence du pere de famille. C'est ce qui nous faiçt redouter les Iugements de Dieu, lesquels ne sont iamais plus seueres que quand il est question de venger les injures faiçtes à

A ij

l'Eglise son Espouse : telles qu'ont esté  
celles que les habitans de vostre ville de  
Montpellier ont faict ces mois passez à  
l'Euesque dudit lieu; L'une, lors qu'ayant  
desiré pour la reformatiō d'un petit Con-  
uent de Iacobins qui y estoit resté, d'y in-  
troduire de bons Religieux dudit Ordre,  
du consentement mesme de ceux qui y  
habitoient, avec l'adueu de leur General  
& l'autorité de la Cour de Parlement:  
Non seulement ils ne l'ont voulu permet-  
tre, ains se seruans de ceste occasion, ont  
chassé les vns & les autres, afin que ceste  
petite maison demeure (comme elle est  
de present) deserte & des habitee: L'au-  
tre, quand presque en mesme temps le  
suisdit Euesque, pour le deub de sa char-  
ge, ayant pourueu aux Catholiques d'un  
des plus fameux Predicateurs de la Frâce,  
pour les Predications de l'Aduent & Ca-  
resme; ils ne luy voulurēt iamais permet-  
tre l'entree de leur ville; quoy qu'il y eust  
Arrest de vostre Conseil, & que le Gou-  
uerneur de la Prouince y apportast tout  
ce qu'il peut de persuasions & comman-  
dements, rendants par leur opiniastrise  
vne desobeyssance esgalle aux vostres &  
aux siens.



Nous dissimulons & endurons facilement pour la Paix & le repos de vos Estats, & pour obeyr à vos Loix & Edicts, qu'en la maison d'Abraham pere des Croyans, c'est à dire l'Eglise, demeure ensemble la cōcubine Agar, & la vraye Espouse Sarra: *Gm. 16.* Mais que celle-là soit la plus fauorie, qu'elle gourmāde & mal-traicte celle-cy; c'est, SIRE, ce que vous ne devez souffrir, puisque iamais les enfans de la chambrière ne peuuent estre legitimes heritiers avec ceux de la vraye Mere de famille.

*Ad Gal. 4.*  
 Nous ne demandons pas qu'à l'imitatiō de ce S. Roy, duquel vous heritez le sang, le nom, & le Sceptre, vous passiez & repassiez les Mers pour chasser de l'Orient l'ennemy du nom Chrestien, ou pour recourir les saincts lieux qu'il occupe injustement; mais bien, SIRE, interpellons nous vostre Religion, & sommons vostre Iustice de ne pas permettre que les subjects Catholiques de vostre Souueraineté de Bearn soient plus mal-traictez que ne sont ceux de la Religion Pretendue Re-formée en cestuy vostre Royaume. Je diray plus, quoy qu'avec honte, mais avec verité, pis que les pauvres Chrestiens sous la domination de cest Infidelle.

Là ces miserables Esclaues trainās leur-  
 chaines aux pieds, ont encores dans  
 Constantinople, siege du Mahometisme,  
 leur Eglise, ou ils s'assembtent librement,  
 leuts Prestres qui leur administrent les  
 Sacrements necessaires pour leur salut:&  
 par tout cest Empire, les Chrestieś Grecs,  
 Armeniens, Iacobites, Georgiens, Ne-  
 storians & autres de diuerſes Sectes, exer-  
 cent en liberte leur Religion, jouissent de  
 leurs Eglises & des biens affectez à icelles:  
 Mais en Bearn apres auoir osté avec l'e-  
 xercice de la Religion, les Temples aux  
 Catholiques, on a despouillé les Eccle-  
 siastiques de tous leurs biens, & iceux  
 contre tout droit diuin & humain em-  
 ployé à l'entretien des ennemis de l'E-  
 glise, aux gages des Ministres, aux pen-  
 sions de grād nombre d'Escholiers qu'on  
 esleue au Calvinisme pour de là estre se-  
 mez par toute la France, & en autres vsa-  
 ges & despenses prophanes.

Le feu Roy vostre Pere de tres-heureu-  
 sc & tres-anguste memoire, qui planta de  
 son vivant vne colonne de l'Eglise Ro-  
 maine dans les faux bourgs de Constan-  
 tinople, pour commencer a donner quel-  
 que ordre à ce desordre, auoit remis les  
 Euesques



Euesques de l'Escar & d'Oleron en leurs Sieges avec quelque nombre de Curez, ausquels il donnoit pension : Mais il reste encores plus de cent, que villes, que bourgs, ou Paroisses, les habitans desquels au moins de trente, les vingt-cinq sont Catholiques, qui n'ont aucun exercice de Religion, ny aucuns Prestres : A quoy nous supplions tres-humblement vostre Majesté de pourueoir.

Nous n'ignorons pas, SIRE, que ce malheur n'est arriué de vostre temps : Mais aussi esperons nous que vous ne permettez qu'il continué de vostre Regne, puisque la Iustice vous oblige à la restitution de tels biens, & la Religion en charge vostre conscience.

L'Escripture Sainte nous apprend, que le Roy Balthazar fils de celuy qui par son ambition deuoroit tous les Royaumes de la terre, & se vouloit faire recognoistre comme Dieu, donnant vn iour à souper aux Princes & Grands Seigneurs de la Cour, commanda qu'on chargeast ses credences de vases, couppes, fioles, & autres vaisseaux sacrez, que foudit pere auoit pillez & emportez du saint Temple de Hierusalem ; & voulut que ses concu-

*Daniel 5.*

bines, en desdain du grand Dieu d'Israël, beussent dedans : Mais elles les tenoient encores collez & attachez à leurs lèvres prophanes, quand on veid descendre du Ciel vne main, laquelle en la presence & aux yeux de ce sacrilege, tout transy d'effroy, escriuit contre la paroy de sa sale trois petits mots, lesquels contenoient sa condamnation, avec les causes & motifs d'icelle: Sentence qui fut aussi-tost executee, pource que la mesme nuit il fut mis à mort, & son Royaume partagé entre les Medes & les Perses.

Employer les biens de l'Eglise pour l'entretien de ses ennemis, qu'est-ce autre chose que faire boire les concubines dās les sacrez Calices ? Sainct Remy premier Pere spirituel de nos Roys Chrestiens, qui obtint par ses prieres ceste celeste liqueur de laquelle vous auez esté oingt & sacré, predict en son testament que iamais ce Royaume ne seroit destruit que par la destruction & changement de la Religion Catholique: Voylà les punitions desquelles Dieu visite les Roys & les Royaumes qui prophanent son seruice, & les choses saintes vouées & destinees à iceluy.

Mais pour autant que, SIRE, nous iu-

geons de vostre genereuse pieté & inclination filiale enuers Dieu, que vous vous laisserez plustost tirer & attirer à ces douces & amoureuses promesses, qu'à la terreur de ses menaces. Oyez de quel amour il cherit ceux qui ayment son seruice.

Cyrus ce grand Monarque, du nom duquel apres vos deuanciers vous vous sentez encores honoré, ayant à la priere des Prestres & Leuites relasché & mis en liberté le peuple d'Israël, lequel de longues annes auparauant estoit captif en ses Estats, avec permission de rebastir le saint Temple, & fourny de moyens tirez des coffres de son Espargne, pour cét effect, & pour l'entretien des sacrifices continuels qu'ils offroient à la diuine Majesté. Le Prophete Isaye dit; Qu'à cause de cela Dieu l'ayma comme son Oingt, le *Isaie 45.* print & le tint par la main pour le conduire en ses conquestes, abatit & renuersa les nations deuant ses armes, brisa les portes de bronze des villes qui luy resistoient, & le combla de victoires, luy dressant & esleuant des mont-joyes & montagnes de trophees & despoüilles.

Telles seront les benedictions que Dieu versera sur vostre chef, SIRE, si



vous donnez la liberté entière aux pauvres Catholiques de Bearn, si vous leur faictes rendre leurs Eglises, & si vous permettez que les Curez & Pasteurs soient reſtablis par tout en leurs biens, charges & honneurs : Reconnoiſſant que vous yeſtes tenu, non par obligation ſeulement ciuile & politique, mais naturelle & diuine: Car par ce moyen vous rendrez les chefs à leurs membres, les ames à leurs corps, les legitimes marys à leurs eſpouzes, les pasteurs à leurs troupeaux, & les peres à leurs enfans.

C'eſt l'vnique moyen de faire paroître que vous poſſedez iuſtement le nom de tres-Chreſtien, ſi ne reſtreignant ny reſſerrant l'exercice de ceſte auguſte qualité dans les bornes de la France ſeule, mais l'eſtendât par tout l'vniuers, vous la faites reconnoiſtre dans les pays de voſtre domination, puis que c'eſt le plus digne que vous ſçauriez obtenir ſur la terre. Le grãd S. Gregoire eſcriuant à vn de nos Roys, diſoit, que d'eſtre Roy ce n'eſt pas grand merueille, puis qu'il s'en trouue pluſieurs autres qui le ſont : Mais que d'eſtre tres-Chreſtien, ce que n'a iamais merité aucun autre Prince, c'eſt ce que vous auez de

plus excellent, & qui vous releue par dessus tous les autres Monarques: Tiltre plus glorieux que tous les triomphes du monde, de la conseruation duquel despend toute la prosperité de vostre Majesté & de ses Estats: A laquelle butteront tousjours les vœux & les prieres de vos tres-humbles, tres obeysants, & tres-fidels subjects & seruiteurs.

FIN.

Les excellents & qui vous ont parachevé  
 les tous ces arts & Monarques & l'illustre  
 Plénitude que tous les honneurs du monde  
 de la confection d'un tel digne  
 tout la prospérité de votre Majesté &  
 de la France: A laquelle par tout son  
 pour les vœux & les prières de vos très  
 humbles, très obéissants & très fidèles  
 sujets & serviteurs.

FIN





